

Cant da treis generaziuns

La casa da vegls e da tgira Sogn Giusep a Cumpadials ha envidau la sonda vargada agl Open Air Cumpadials. Sper las formaziuns enconuschentas ein cussadentas e cussadents sepresentai communablamein cun persunal da tgira e cun in chor ad hoc dalla scola da Sumvitg sco formaziun da treis generaziuns, Ils cantapurs.

ANDREAS CADONAU/FMR

«La musica enconuscha negins cunfins da vegliadetgna.» Cun quei motto ha la Casa Sogn Giusep envidau la sonda vargada agl Open Air a Cumpadials. «Nus envidein vus cordialmein ad in nunemblideivel gi plein musica e festevin cun tuttas generaziuns.» Quei han ins saviu leger ella invitaziun agl open air organisau dalla casa da vegls e da tgira.

Igl ei stau il secund open air suenter ina pausa da nov onns. Sepresentadas a quella occurrenza a Cumpadials ein formaziuns enconuschentas en Surselva, sco per exempel la gruppa da sunatibas Postabiala, bands da giuvnas e giuvens musicists dalla Scola da musica Surselva e lu las corifeas indigenas, Ils Passiunai, *Dario Hess* e band, ils Galiots e lu era Munz & Töne da Cuera sper Table 14, ina band giuvna grischuna. En egl el program da fiasta ei denton la formaziun «Ils cantapurs» da Rabijs curdada.

Chor da scolars ad hoc

Ina gruppa da purs che sededichescha al cant ei denton buca sepresentada agl open air dalla Casa Sogn Giusep. La menadera dalla casa da vegls e da tgira, *Ruth Camenisch*, ha tradiu ch'ei setracti da 18 scolaras e scolars dalla Scola da Sumvitg che segien stai promts da sepresentar agl Open Air Cumpadials. «Nus havein denton era ponderau co la Casa Sogn Giusep savess contribuir agl open air», ha la menadera dalla casa da vegls e da tgira getg. La casa ei sedecidida d'organisar provas da cant per cussadentas e cussadents communablamein cun collaboraturas dalla instituziun. «Miu um Glieci Camenisch ha surpriu da direger las provas.» Ina ga per meins ei la gruppa lu mintgamai seradunada per ils exerchezis da cant. «Buca tuttas persunas ein adina disponiblas, aschia ch'il diember dallas cantaduras e dils cantadurs variavan dad ina prova a l'autra da 15 entochen 35 persunas», ha la menadera dalla Casa Sogn Giusep dau d'entellir.

Canzuns communablas

Da direger il chor da scolaras e scolars ha la scolasta *Esther Hendry* surpriu. «Nus essan ina formaziun ad hoc dalla tschun- e sisavla classa e dalla emprema superiura.» Ed ei ha era dau exerchezis communabels cun la gruppa da cant da seniors e dad emploiadas ed emploiai, sco quei che *Esther Hendry* ha tradiu. «La finamira ein



Cant communabel da treis generaziuns cun «Ils cantapurs» agl Open Air dalla Casa Sogn Giusep a Cumpadials la sonda vargada.

FOTO MAD



Dalla partida ein era stadas bands indigenas sco Ils Passiunai.

FOTO ANDREAS CADONAU

stada da presentar communablamein agl Open Air Cumpadials treis entochen quater canzuns.» Canzuns tradiziunals sco quei che *Esther Hendry* ha getg, ed ella ha discurriu dad ina experienza speciala d'exercitar canzuns cun treis generaziuns - scolaras, emploiadas e seniors e senioras.

«Tuts eran empau nervus avon la presentaziun communabla dalla sonda», ha *Esther*

Hendry tradiu. La menadera dalla casa da vegls e da tgira ei stada intimada dalla presentaziun dallas treis generaziuns. «Nus havein stuiu improvisar in tec.» Coordinar il cant da treis generaziuns ei nuota stau aschi sempel. Per *Ruth Camenisch* ein las provas da cant ell'atgna instituziun secumprovadas: «Ellas enfirmeschan il spért da cuminonza en nossa instituziun.»

LAAX



Igl uestg *Joseph Maria Bonnemain* ha celebrau la messa festiva.

FOTOS FLURIN SCHÜTZ

Festivau in miez tschentaner

La pleiv roman-catolica da Laax ha festivau la fin dalla jamna siu giubileum da 500 onns. Ella ha denter auter fatg quei la dumen-gia vargada, ils 17 d'uost 2025 cun survetsch divin festiv cu-gl uestg diocesan *Joseph Maria Bonnemain*. La sonda sera ha la pleiv dedicau a sia atgna historia che ha entschiet igl onn 1525. *Erwin Ardiser* ha schau repassar ella baselgia parochiala ils fatgs histo-rics che han menau alla fundaziun dalla pleiv da Laax. Ina pleiv che ha giu da batter en ses emprems onns denter auter cun mun-conza da mieds finanzials. Per consequenza ha la pleiv era buca saviu engaschar in plevon ils emprems onns d'existenza. La pleiv ha denton buca mo tematisau fatgs historics. A plaid ein era ve-gni collaboraturas e collaboraturs dalla pleiv ch'ei s'engaschai duront biars decennis en diversas incaricas a favur dalla cumi-nonza. Ed el decuors dalla sonda vargada ha era il Museum da Laax tematisau il giubileum ed envidau ad ina occurrenza per af-fons e famiglias. (fmr/ac)



E silsuenter festivau il giubileum da 500 onns cun las libras da Laax.

reclama

FMR
VITAMIN R
LECTURA RUMANTSCHA

